

7

1613

3466

L E T T R E


D V R O Y

A M O N S I E V R

LE P R I N C E D E C O N D E

l

1613



3
LETTRE DV ROY A
A MONSIEVR LE PRINCE
DE CONDE.

MON COUSIN, Je vous ay par plusieurs fois fait sçauoir le desir que i'auois que vous m'accōpagnassiez au voyage que ie veux faire en Guyenne pour l'accomplissement de mon mariage, & vous ay fait conuier de vous y disposer & reuenir pres de moy pour ce subject, & mesmes le vous ay fait entendre mes bonnes intentions sur quelque poinct dont vous desiriez estre esclarcy, auparauant vostre retour, tant sur les affaires generales que autres, ayant pour cest effect enuoyé à diuerses fois vers vous le fleur de Villeroy, qui y est encores à present, & par lequel vous auriez peu aussi estre informé & assuré de mon affection & bienueillance & de celle de la Reyne Madame ma Mere en vostre endroiect; Neantmoins ie n'ay peu iusqu'à present sçauoir vostre intention pour ce regard, n'ayant encores eu que des delays & remises de vostre part. Cependant estant pressé de m'ache-miner, l'enuoye le Sieur de Pont Chartrain, mon Conseiller & Secretaire d'Estat par de là, pour avec ledit Sieur de Villeroy vous dire la resolution que i'ay prise de partir, pour faire mondit voyage Samedy premier du mois prochain, sans aucun retardement vous prier & conuier derechef de ma part de venir pres de moy pour m'accompagner & y tenir le rang quiest deu à vostre qualité & naissance; ou bien dire en presence dudit Sieur de

Pont Chartrain si contre ce que vous m'avez fait
esperer, vostre intention est d'y apporter refus ou
difficulté, & me desnier ce contentement, afin qu'il
m'en apporte entier esclarcissement, estant le prin-
cipal sujet de son voyage. Me remettant donc sur
ce que ledit Sieur de Villeroy & luy vous en diront
de ma part, Je prie Dieu, MON COVSIN, qu'il vous
ayt en sa sainte garde,

Esript à Paris ce 26.iour de

Iuillet 1615.

Signé

L O V Y S.

& plus bas,

DE LOMENYE.

Responce de Monsieur le Prince.

SIRE,
S'AYANT apprins par celle que Vostre Majesté m'a
fait l'honneur de m'escrire par le Sieur du Pont
Chartrain du 26. de ce mois la prompte resolution
qu'avez prise de partir pour vostre voyage de Guye-
ne, & le Comandement qu'il vous plaist me faire
de vous aller trouver, pour y accompagner V.M.
J'ay estimé que ce partement si precipité (sans au-
parauant auoir donné ordre aux affaires de vostre
Estat & pourueu aux desordres qui vous ont esté
representés, tant par les Estats Generaux que par
vostre Cour de Parlement de Paris) estoit vne
continuation des mauuais conseils de ceux qui en
sont les auteurs, lesquels ie n'ay cy deuant nom-
més dans mes tres-humbles remonstrances, afin de
ne vous desplaire, **SIRE**, ni à la Reyne vostre me-

re sous l'esperance que j'auois qu'ils cesseroient d'abuser de la bonté de V.M. Mais puis qu'ils continuent à se seruir de vostre autorité pour pretexte & couuerture de leurs pernicioeux desseins & violents conseils trop recognus aujourd'huy pour en doubter trop publics pour les tolerer & souffrir plus long temps, puis qu'ils tournent à la subuersion de vostre Estat, à l'affoiblissement de vostre Couronne & à la ruine de ceux de vostre maison. Et d'autres Princes, Officiers de vostre Couronne, & principaux Seigneurs de vostre Royaume. Je suis contraint, SIRE, apres vne longue patience, de représenter à Vostre Majesté (avec toute humilité & le respect que doit vn tres-humble subject à son Roy) les iustes raisons qui m'empeschent d'obeir si promptement à vostre commandement. Je diray donques à Vostre Majesté que lors que ie fus retiré à Chreil. Vous ayant pleu y enuoyer vers moy Monsieur de Villeroy pour me commander de vostre part de vous aller trouuer avec offres qu'il me fit que Vostre Majesté aduiseroit de donner vn bon ordre aux affaires publiques de son Royaume, Je luy fis responce qu'ayant esté huit mois à Paris où j'auois veu le commencement le progres & l'issüe des Estats telle qu'elle a esté, les procedures qu'on y a tenuës pour pratiquer & corrompre les Deputés & en eluder les deliberations & resolutions, le Parlement gourmandé & indignement traicté, pour auoir voulu seruir Vostre Majesté, ma vie, & celle de plusieurs autres Princes & Seigneurs de qualité, mise en compromis : parce que ie disois librement, avec eux, mes aduis

dans vos Conseils, sur ce qui s'y presentoit pour
 vostre seruice & le bien de vostre Estat, ie n'y
 pouuois retourner avec dignité ni seureté, ius-
 qu'à ce qu'il eust pleu à Vostre Majesté pouruoir à
 la reformation de ses Conseils & aux des-ordres
 publics contenus és remonstrances de vostre Par-
 lement, sur quoy derechef ayant pleu à Vostre Ma-
 jesté de renuoyer vers moy ledit Sieur de Villeroy
 à Clermont avec quelque pouuoir plus ample,
 qu'il n'auoit à son premier voyage nous confera-
 mes ensemble de la reformation de vofdicts Con-
 seils & des reiglemens qu'il auoit eu charge de me
 faire voir, Et pour le regard des remonstrances du
 Parlement ie reseruay à luy dire mon intention, a-
 pres en auoir conféré & prins l'aduis des autres
 Princes Officiers de vostre Couronne & Seigneurs
 qui concurrent en mesme opinion avec moy. Et
 ne sont moins affectionnés à vostre seruice, au
 bien de vostre Estat, & affermisement de vostre
 Couronne. Ainsi que ledit Sieur de Villeroy a
 fait entendre à Vostre Majesté, laquelle n'ayant
 point desagréé ce qu'il auoit commencé à traicter,
 auroit encore trouué bon de le renuoyer en ce
 lieu, où estant arriué dès ce matin nous estions des-
 ia entrés en cōference sur les dites remonstrances: en
 sorte que les choses sembloient estre en terme d'un
 bon accommodement quand ledit Sieur de Pont
 Chartrain est arriué, qui m'a donné les lettres de
 Vostre Majesté, & fait entendre son prompt parte-
 ment, lequel priue le public du fruct qu'il esperoit
 de l'issuë de ceste conference rend les choses qu'on
 s'y pouuoit promettre impossibles à executer auant

iceluy à cause de sa precipitation, & par ce moyen
 accroist les desordres qui sont en vostre Estat, dont
 ie suis contraint de nommer les auteurs à V. M.
 qui sont le Mareschal & la Mareschalle d'Ancre, le
 Châcelier, le Cheuallier de Sillery, Dolé & Buliõ qui
 auoient esté seulemēt designés par les remonstran-
 ces du Parlement, desquelles ie supplie treshum-
 ment V. M. faire Iustice au public ordonnant que
 les plaintes faictes de leurs actions & deportemens
 seront verifiees, & qu'il sera procedé contre eux
 par les voyes ordinaires suiuant suiuant les formes
 accoustumees, comme aussi de l'assassinat commis
 depuis quelques iours en la personne du Sieur de
 Prouille Sergent Major de la ville d'Amiens, par
 vn soldat Italien de la garnison de la citadelle, ordõ-
 nant qu'il soit mis es mains de Iuges ordinaires pour
 luy faire & parfaire son proces, ainsi que merite vn si
 meschant acte. Et iusques à ce que les reiglemens
 pour la reformation de vos Conseils soient faicts
 & executés les remonstrances de la Cour exami-
 nees, pouru en ausdits desordres contenus en icel-
 les & la Iustice faicte tant de personnes qui y sont
 designees, que ie nomme à present à V. M. que du-
 dit soldat Italien, Je la supplie treshumblement m'e-
 xcuser si ie ne la puis suiure en son voyage, Ce qu'au-
 trement ie ferois, & feray sans difficulté, s'il plaist
 à V. Majesté pouruoir à ces choses, auant son par-
 tement voulant tousiours par mon obeissance luy
 tesmoigner que ie suis

SIRE,

Vostre treshumble & treshobeis-
 sant subiect & seruiteur,

de Coucy ce 27. Iuil. 1615. H. DE BOURBON,

